



Minggu, 06 Oktober 2024

Ogen: Sakaria 13:1-6



Mbersihken Kemelketen



Melket, e me kecibal sada hal: ingan, uis, geluh ras sidebanna si lanai mehuli janah lanai bo ate kalak ngena. Uis adi melket icuci, rumah isapui, daging kula ridi. Bage me perbahanenta gelah kita bersih. La sitik bahan-bahan si itawarken perbinaga gelah banci mbersihkan si melket ndai, gelah kinclong, halus, lembut, bersih. La saja sabun, deterjen, bayclin tapi sapu. Bersih jadi sada perayaken manusia sabab umumna manusia erngena ate nandangi si bersih. La melket i bas tatapen, kula ntah pe pisik. Kuga kerna perukuren, perbahanen ras biak manusia? La saja manusia tapi Dibata pe e nge pindonna. Dibata erngena ate nandangi kegeluhen si bersih, ndauh i bas si melket nari.

Bagenda me ibas renungenta wari enda, maka Dibata nehken beritana maka i bas pksana pultak me pagi ulu lau guna mbersihkan kesusuren Daud ras kalak Jerusalem. Dosa erbahan kesusuren Daud ras kalak Jerusalem enggo melket, lanai terpake, enggo mbau. Perlu kal lau guna murihi ras mbersihkenca. Bage me Anak Dibata si inubuatken desken ulu lau mbersihkan kerina si melket, nebusi dosa-dosa manusia. Kerina berhala si mabai manusia ndauh i bas Dibata nari, erbahan pajuh-pajuhenna, kerina e ikernepen Dibata. Termasuk nabi-nabi palsu ernubuat kerna si la payo. Sie kerina ibersihkan Dibata.

Dibata ngenca ngasup mbersihkan si melket. Kerina geluhta, daging kula ras perukuren rikut perbahanenta simelket ibersihkenNa e maka ula nai kal kita ercebah i bas kubang dosa. Mbau iakap Dibata, mbau iakap temanta, kita pe labo teneng geluhta, adi melket denga nge. Sidahilah ulu lau singgeluh, gelah ibersihkenNa dirinta.